

Ẹkwo-ozì, Pọlu Deru Nù Ndu Kọlosì

¹ Ọwa-a bụ ẹkwo-ozì, mụbe Pọlu ede. Mu bụ onye Chileke ọtaru mee gẹ mu buru onye-ishi-ozì Kéreshi Jizọsu. Onye mu l'iya gba mgba ede iya bụ nwanna anyi, bụ Timoti.

² Ndu anyi ede iya anụ bụ ndu kẹ Chileke; mbụ ndu ọphu nọ lẹ Kọlosì, bụ unwanna anyi ndu ọphu nọ l'ẹka Kéreshi.

Mu sụ gẹ Chileke, bụ Nna anyi yẹle Nnajiuphu, bụ Jizọsu Kéreshi meeru unu eze-iphe-oma; l'o mekwaaphọ g'unu buru l'ẹhu-guu.

Epfu anụ Chileke ekele iya ekele

³ Anyi anọdujeepho ekele Chileke, bụ iya bụ Nna kẹ Nnajiuphu anyi, bụ Jizọsu Kéreshi mẹ anyi -nọdu epfu opfu ẹhu unu anụ Chileke. ⁴ Noo l'anyi nọmawaru g'ekwekwe unu shihuberu ike l'ime Kéreshi. Anyi bya anumaakwapho l'unu yeru ndu-nso obu g'ẹphe ha. ⁵ Kẹle unu ele ẹnya iphe, a kwakọberu unu l'imigwe; mbụ iphe ono, e meru; unu maru teke ono, a byaru bya ezia unu ozi-oma ono, bụ ọkpobe-opfu ono. ⁶ Ozi-oma ono erekwa ire l'ẹkameka bya atukoakwapho mgboko ejedzuru. Ọ buru ẹgube ono bụ g'o jedzuru ẹka unu nọ bya ere ire lẹ ndzụ unu e-shi mbọku, unu nọmaru iya; o doo unu ẹnya ree; mbụ iphe, eze-iphe-oma Chileke ono bụ.

⁷ Ọo Epafurasu, bụ onye anyi yeru obu; onye anyi l'iya tukuru eje ọdu ozi lanụ bẹ bụ onye

ziru unu ozi-oma ono. Epafurasu ono bu onye goshiwaru le ya bu onye e gude ire iya aka l'ejeru Kereshi ozi; o buru iya no-chiru enya anyi l'ibe unu; ⁸ teme o buru iya pfuru anyi ke n-yemobu unu ono, shi l'eka Unme-du-Nso ono.

⁹ Nokwa iphe, meru g'o gude ebe anyi atuwojeduru aka l'epfu anu Chileke l'iswi ehu unu; g'o mee g'unu makotajeru iphe, bu uche iya; waa k'ophu mmamiphe, shi l'eka Unme-du-Nso edoje enya ree. ¹⁰ Oo ya bu g'unu emejekwanu umere, l'e-me ge ndzu unu l'ophu buru iphe, unu l'e-gude akwabeg Chileke ubvu; teme unu emekwapho iphe, du Chileke ree l'iphemiphe, unu eme ememe. Unu eshi egube ono meje iphe, bukpuo iphe-oma tekenteke; kakwapho amarweta onye Chileke bu. ¹¹ L'o gude ike iya ono, du biribiri mee unu g'unu shihu ike okpobe eshihu; k'ophu unu a-duje ike gude ata nshi nwejeru obu l'iphemiphe, byaru unu. ¹² Unu egudejekwapho ehu-utso keleje Chileke, bu Nna ekele. Noo l'oo ya bu onye meru; unu buru ndu gbaru g'unu le ndu-nso gbaru mgba l'iphe, o kwakoberu phe l'eka ono, bu iphoro dukota iya ono. ¹³ O dzotaruru anyi l'eka ochii nweru ike bya eworu anyi je edobe l'eka Nwa iya, o yeru obu bu eze. ¹⁴ O buru iya be e shi l'anwuhu iya gbata anyi; bya agukwaarupho anyi nvu l'iphe-eji.

Onye Kereshi bu me iphe, oomeje

¹⁵ Oo ya bu ugbugba Chileke ono, a ta ahumajedu l'enya ono; bya aburu iya be Chileke doberu l'okpara l'iphe, bukpuo iphe, o meru ememe. ¹⁶ Noo kele oo l'eka iya be Chileke shi

mekota iphe, bukpo iphemiphe, bu ophu du l'imigwe me ophu du le mgboko; ophu enya ahumaje me ophu a ta humadu l'enya; mbu ndu eze ojozi-imigwe; me ndu bu nnajioha; me ndu ochi-oha g'ephe hakotakpoo; me ndu ophu no l'oke okwa, nokota l'imigwe. Oo yebedua, bu Kereshi ono be Chileke shi l'eka iya mee iphemiphe kpoo; teme o buru iya be o meru iya doberu. ¹⁷ Yebedua l'onwiya vukota iphemiphe uzo duhaadaa. O bukwarupho ike nkiya be o gude mee iphemiphe, Chileke meru ememe; o dukota l'eka Chileke doberu iya. ¹⁸ Oo ya bu ishi, kpoo-pfuru l'ogwehu iya ono, bu Chiochi. Oo yebedua bu eka ndzu l'ophu futaru. O bukwaru iya pho bu onye ivuzo, Chileke meru o shi l'onwu teta nodu ndzu; k'ophu oo-buru iya a-kakota shii l'iphemiphe, Chileke meru ememe. ¹⁹ Oo Chileke be chiru iya l'obu iya mee g'o buru l'ehu Nwa iya be aa-huma-gbukpoo iphemiphe. ²⁰ Waa g'oo bukwarupho l'eka Nwa iya ono be ya e-shi mee ge yele iphemiphe, no l'imigwe me ophu no le mgboko du le ree. Ya eshi egube ono gude mee ono, Nwa iya gbashiru l'oswebe ono mee g'opfu ta adheru yebe Chileke yele iphemiphe, o meru ememe.

²¹ Noo l'o nwekwarupho teke unubedua shi buru ndu 'anodu Chileke l'eka. O buru ejo-iphe unu shi anoduje aru l'oriri; eme iya l'umere be shi mee; unu buru ohogu Chileke. ²² Ole nta-a be Chileke shiwaa le ndzu, Nwa iya shi nodu l'eliphe-a waa anwuhu, o nwuhuru; mee g'unu l'iya du le ree; k'ophu Nwa iya ono e-duta unu; unu aburu ndu duru Chileke iche; o to dudu

iphe, aata unu ụta iya; ọp̄hu unu abụduru ndu aamaru ẹjọ ẹka jasụ l'o duta unu bya apfube l'ip̄hu Chileke ono. ²³ Ọle iphe, unu mefutaṅe bụ l'unu a-pfushi ike l'ekweta unu; kp̄oo onwunu g'abara; ọp̄hu unu ekwedu g'e mee unu g'unu wofu obu l'iphe ono, unu ele ẹn̄ya iya ono, bụ iya bụ ozi-oma ono, unu n̄maru ono, e zidzuru mgboko mgburugburu ono; bya abụkwaru iya ph̄o b̄e Chileke ziru mb̄edua, bụ P̄olu ḡe mu je ezia ndu ọzo.

Ozi, Chileke ziru P̄olu g'o je ezia Ch̄iochi

²⁴ Nta-a b̄e ẹhu atsokpoo mu uto; kele ọo unu b̄e mu ejedoru iphe-ehuka-a. Noo kele ọo iphe-ehuka-a, mu eje nta-a b̄e mu gude eyeta ẹka eme g'o dzukota mb̄u iphe, ph̄odukwaduru l'iphe-ehuka ono, K̄reshi jeru jedoru ogwehu iya ono, bụ Ch̄iochi. ²⁵ Ọo Chileke ono, bụ onye hotaru mu n̄ ḡe mu buru onye-oz̄i Ch̄iochi b̄e ziru mu ozi ḡe mu zia unu; ḡe mu mee unu g'unu tuko iphe, ya pfuru makotaru; ²⁶ mb̄u iphe ono, o shi domia edomi eshinu o meru mgboko ono. O be nta ọ bya egoshi iya ndibe iya, d̄u ns̄o. ²⁷ Ọ buru ph̄e b̄e Chileke hotaru l̄e ya e-goshi iphe ono, nyiberu anyibe ono, e shi domia edomi l'ẹn̄ya ndu abudu ndu Jiu ono, bụ iya b̄u l'ị - n̄odu K̄reshi l'ẹka; l'ịi buru onye e-mechaa gbua nw̄inwii. ²⁸ Ọo opfu ẹhu iya b̄e anyi an̄oduje asa kpaa kpaa g'on̄yemonye n̄uma-a; al̄o on̄yemonye ẹka l̄e nch̄i gude mmamiphe ezi iphe k'ọp̄hu anyi e-me on̄yen̄onu g'ọ buru onye n̄o l'ime K̄reshi buru onye d̄uebe ree. ²⁹ Noo g'o gude mu n̄odu an̄oduje eseshi akanya ike; kukebe ẹhu eme ḡe

mu e-me jeḗbe ozi ono, Chileke ziru mu ono. Ike, mu gude eje ozi-a bẹ bụ ike ono, Kéreshi eyeje mu l'ẹhu ono. Noo ike, l'ere ire l'ẹhu mu bụ onoya.

2

¹ Iphe, mu eme g'unu maru bụ lẹ mu ese akanya unu eseshi iya ike; mẹ akanya ndu Chiochi, nọ lẹ Layodeshiya; mẹwaro iphe, bukpoonu ozo, mu l'ẹphe teke ahuma-swee lẹ ndzu-a. ² K'ọphu obu e-shihu pẹ ike; wafua g'ẹphe tugba buru nanu lẹ n-yemobu; ọo ya bụ g'ẹphe abya amaẹbekporu okpobe-opfu ono; e-shi ẹgube ono iphe ono, Chileke shi domia edomi ono edoo pẹ ẹnya ree, bụ iya bụ kẹ Nna yele kẹ Kéreshi. ³ Oo l'ime Kéreshi ono bẹ Chileke domiru iphe, bukpoonu ẹku, du lẹ mmamiphe yele nkwamenya l'ọphu.

⁴ Iphe, mu gude epfu iphe-a bụ k'ọphu ọ to dudu onye a-bya egude ire mecha mecha duswee unu ọzo. ⁵ Kele a makwaru-a lẹ mu ta anodu l'eka ono, unu nọ ono; ọle ọ kwa-a l'eka ono, unu nọ ono bẹ obu mu du. Iphe, atsoje mu utso bụ g'unu gude mekoobe onwunu buru nanu waa g'unu gude buru enwubata enwubata l'ekwekwe, unu kweru kẹ Kéreshi.

Jizosu bu nnajioha

⁶ Oo ya bu; eshinu unu gbobewaru eka labo nata Kéreshi Jizosu ọ buru Nnajiuphu unu; unu l'iya tugbaekwapho buru nanu kwaseru. ⁷ G'ọ bukwarupho g'oshi agbabeje ogbarabvu l'ime ali-a bụ g'unu a-gbabe ogbarabvu l'ime Kéreshi.

G'ò buru Kéreshi bẹ l'a-buru ọkpa-ulo, unu a-nodu akpu ndzu unu l'eli iya. Unu akabaa ekweta iphe ono, e ziru unu ono kweshia ya ike. Unu egudejeepho obu unu g'ò ha ekele iya k'anyinyi.

⁸ Iphe, unu akwaberu enya bu g'ò tọ du onye e-gude mmamiphe nwomaru-ọ-machata me ugho, enwedu ishi bya aturwua ekweta unu. Iphe ono bukota iphe, shi l'iphe, ndiphe ezi; bya aburu iphe, a toru okpa iya su g'e tsoje, bu iphe, eshidu Kéreshi l'eka. ⁹ Noo l'ọo l'ehu Kéreshi ono, byaru bya aburu nemadzụ ono bẹ Chileke l'onwiya byaru bya edzua oke egoshikota onye ya bu. ¹⁰ Chileke bẹ shiwaa l'eka Kéreshi ono, unu l'iya tugbaru buru nanu ono mee ge ndzu unu dzua oke. O buru Kéreshi ono bu onye-ishi, kakota iphe, bukotakpoo ndu ochi-oha imigwe g'ephe hakotakpoo; bya akakotakwapho ndu nokwapho l'oke okwa l'imigwe.

¹¹ Su-a; o kwa teke ono, unu l'iya byaru bya atugba buru nanu ono bẹ e buru unu ubvu; mbu ubvu ophu abudu eka bẹ e gude bua ya unu. Oo Kéreshi l'onwiya bu onye buru iya unu. Ubvu ono, o buru unu ono bukwa ogwehu unu l'ophu bẹ o yefuru unu g'onye yefuru uwe; mbu ogwehu unu ophu iphe-iji shi phawaa kutukutu.

¹² Le teke ono, e meru unu baputizimu ono bẹ a tukoakwaru unu le Kéreshi likota elili. Tem Chileke tukokwapho unu l'iya mee unu tuko shi l'onwu teta dzuru ndzu. Noo l'unu kwetaru l'ike du Chileke bya achiru upfu ye l'ike iya ono; mbu ike ophu, o gude mee Kéreshi o shi l'onwu teta dzuru ndzu. ¹³ O nweru teke

unu shi nwùhu anwùhu kwaa l'ime iphe-eji unu; òphu unu ebuduru úbvù; òle nta bẹ Chileke byawarù emee; unu lẹ Kéreshi tuko nòdu ndzù; ò gukotaru anyi nvù l'iphe, bukpoò iphe-eji, anyi meru g'ò ha. ¹⁴ O tükochaa iphe ono, e deru edede l'èkwo ono hushikòtachaa g'ò ha; mbù iphe ono, egoshi l'anyi darwùkotawaru iphe, ekemu iya pfuru, bù iphe ono dùwaa g'ùgwò, tópyitaru anyi l'èkpiri ono. Chileke mechaa nno bya atuko iphemiphe ono kpopyabe l'oswebe shi egube ono mee ya o rebuhu ire. Ophu oo-rebaèdu ire je aduwaruro ya. ¹⁵ Oo teke phò, Kéreshi nwùhuru l'oswebe phò bẹ o chikporu ike iphe, bukpoò òchi-òha, nòkòta l'ephekerephe; mẹ ike iphe, bukpoò ndu òphu nò l'oke òkwa l'ephekerephe; kpua phẹ lẹ ndzù kpufuta l'edzudzu-òha teke ono, yèbedua l'atù okoo k'alwù-gbu, ya lwù-gburu phẹ ono.

¹⁶ Oo ya bù; g'ò tò dukwa onye a-bya anòdu akpòcha-pheru unu mkpòcha l'iphe, unu eri eriri mẹ l'iphe, unu angù angungu. Ophu ò dukwa onye a-bya akpòchaaharu unu mkpòcha kẹ l'òwaa iphe, unu abòje; g'unu dobekwa mbòku òphuu bọje iya abòbo; òzoo l'ònwà fùkwaru k'òphúú g'unu watakwa iya abòbo; òzoo k'iphe, unu e-meje mbòku atùta unme. ¹⁷ Ekemu ndu Jiu ono g'ò hakòta, e shi tushia k'iphemiphe ono bẹ shi bukòtaru onyonyo iphe, l'e-mechaa mee l'iphu. Obenu l'òphu bù òkpobe iya bù Kéreshi. ¹⁸ Oo ya bù g'unu te ekwekwa g'ò dùru onye l'abya akpòshia unu anata obunggo ono, Chileke l'e-bu unu ono. Unu b'ekwekwa gẹ ndu ono, òonoduje atso útso l'èphe emeje

g'a sù l'èphe wozeru onwophè alì ono nafù unu obunggo Chileke. Èphe anòduje epfu g'a baje ru unwu-ojozi-imigwe eja; èphe asù l'iphe, èphe gbaberu òkpa epfu iya bù òphulenyà, èphe phuru. Ègube ndu ono anòdujee pho eku onwophè iphe, èphe ahadù g'òo ya. Ò buerupho egomunggo, enwedu ishi bè èphe anòduje agba. ¹⁹ Èphe ta anyatajèedu l'ò dùru onye bù ishi, bù èka ogwèhu dzepfuru lè nkwo iya lè nkwo iya; mèkpoo akwara, dùkota l'èhu. Ò bùru ishi emeje ogwèhu ono l'oovu evuvu gè Chileke tüberu.

Anwùhu waa eteta k'onye lè Kéreshi

²⁰ Sù-a; eshi òphu unu lè Kéreshi tükoru nwùhukota bè Chileke bọfuakwaru unu l'eme iphe, ndiphe tóru òkpa iya, sù g'e tsoje. ?Bù gùnu meru g'ò gude unu nòdu emekwadu gè ndu bùkwadu ndu mgboko-a; emekwadu iphe, ekemu pfuru, bù òphu sùru: ²¹ “B'ebiyikwa èka lè nri òwa! B'edekwa òwa-a ire; òphu i denyikwa òphuu èka?” ²² Iphe, bùkpoo ekemu ono g'ò ha tükokwaru bùleru-a iphe, nemadzù ezi waa iphe, a tóru òkpa iya sù g'etsoje. Noo kèlè iphe, eeri eriri bù e -richawa iya bè ò bvùwaru. ²³ Iphe ono, èphe ezi ono adujekwa g'ò shi lè mmamiphe; bya abùru iphe, nemadzù gude èka kotaru onwiya; bùru ndu eme g'a sù l'èphe wozetaru onwophè alì; bùru ndu anù ogwèhu phè aphù. Òlè iphemiphe ono ta adùkwa òphu eyetajèru phè èka g'èphe sede onwophè l'ègu èjo-iphe, l'agù phè nù.

3

¹ Sù-a; eshinu Chileke mewaru unu lẹ Kéreshi tuko shi l'ọnwu teta dzuru ndzu; unu chojenu ọzo, unu e-shi g'iphe ono, du l'imigwe ono rwube unu ẹka; mbu iphe, du l'ẹka ono, Kéreshi no l'ẹkutara Chileke ono. ² Unu woru uche unu dobe l'iphe ono, du l'eli ono; unu te ewoshiru iya dobe l'iphe ke mgboko l'ẹka-a. ³ Noo kele unu nwuhuru anwuhu. Ndu unu be Kéreshi wowaru domia l'ẹka Chileke. Kéreshi nodukwanu l'ime Chileke. ⁴ Oo Kéreshi be bu okpobe ndzu anyi g'anyi hakota. Teke ono, Kéreshi a-bya ozo ono be unu e-tsokwaru iya pho bya. Unu l'iya agbaru mba l'odu-biribiri iya.

⁵ Oo ya bu; unu pyi-gbushia iphe, bukotakpoo iphe ke mgboko-a, bu iphe, dzukwadu ndzu l'ehu unu, bu iya bu; apharwushi onwonye; umere, rehuru erehu me egu eme ejo-iphe; iji-nya me nya-pfurupfuru, bhukwapho agwa obvu. ⁶ Oo iphemiphe ono be l'e-me g'oke-ehu-eghu ke Chileke dapfu ndu ta ndu iphe le nchi. ⁷ O nwekwaru-a teke unubdua shi emegbaa iphemiphe ono, bu iya bu teke ejo-iphe ono shi gudegbaa ndzu unu eme g'o du iya.

⁸ Ole nta-a be unu a-ha iphemiphe ono. Unu haa ehueghu; obu oku; edoberu nwibe unu ejo obu; ephu nemadzu iphu. G'opfu erehu te eshijekwa unu l'onu. ⁹ Unu ta adzujekwaru nwibe unu aka; eshinu unu hakotawaru akahu umere ono yee ejo ememe, tso iya nu. ¹⁰ Oo ya bu g'unu yee umere ophuu ono g'onye yeru uwe. O kwa Chileke ono, nru unu umere ophuu ono anoduje eme unu g'unu kabaa aburu ndu o

meru k'òphúú. Ọo ya bụ g'unu amakọtaru onye Chileke bụ; marwee ya amarwe k'òphu unu a-nọdu akabaa adụ g'ọ dū kwaseru. ¹¹ Eshinu ọ dūwaa nno bẹ a ta akpahẹkwa ishi kẹ l'onye ọphuu bụ onye Jiu; onye ọphuu buru onye abudu onye Gurisu; onye ọphuu buru onye buru úbvù; ọphu onye ọphuu ebuduru. Onye ọphuu bụ nlwamulwa; onye ọphuu buru onye ime-ọswa. Onye ọphuu bụ ohu; onye ọphuu buru amadu. Ọ bụwaa Kéreshi bụ mkpakọ lẹ nswikọ; tẹme o buru l'ime onyemonye.

¹² Unu bụ unwu Chileke. O yeru unu obu bya ahọta unu g'unu buru ndu nkiya. Noo g'o gude unu je aphujeru nemadzu obu-imemini; nwejeru obu ọmaa; unu wozeje onwunu alị; meje odoo; unu atajeru iphe nshi. Unu tuko iphe ono g'ọ hakota chita yee g'onye yeru uwe. ¹³ Nwibe unu -mee unu eji; unu tagbuje iya lẹ nshi. Teke nemadzu meru unu iphe, unu a-ta onye ọbu ọta; unu aguaru iya ya nvu. Nnajiuphu guakwaru unu nvu l'iphe-eji unu. Ọo ya bụ; unu gujekwaru ndu ọzo nvu m'ephe meswee unu. ¹⁴ Ọphu kachakponu l'iphemiphe ono bụ g'unu yee nwibe unu obu. G'ọ chikobe unu g'unu tugba buru nanu okpobe aburu. ¹⁵ G'ẹhu-guu ọphu shi Kéreshi l'ẹka nọdukwa l'obu unu; duzi unu ọzo; kele ọo ya meru g'o gude Chileke kukobe unu g'unu bya aburu ogwehu lanu. Unu keleje Chileke ekele iphe onoya.

¹⁶ Unu kwe g'opfu kẹ Kéreshi ono bya eburu l'ime obu unu dzua ya oke lẹ mmamiphe; ezi iphe; yele adu nwibe unu obu. Unu egudekwa

iya phọ alọru phẹ ẹka lẹ nchi. Unu guje ebvu-oma nu Chileke; me ebvu ekele; me ebvu ozo, shikota Unme-du-Nso l'eka. Unu gude obu unu g'ọ ha meje iphemiphe ono; gude nno ekele Chileke ekele. ¹⁷ Iphe, bukpo iphe, unu epfu epfufu me iphe, unu eme ememe; unu gudeje epha Nnajiuphu, bu Jizosu Kereshi mekotaje iphe obu. Mbua; unu shije Kereshi l'eka kelejekpopho Chileke, bu Nna ekele.

Umere, ee-meje l'unuphu ndu ke Kereshi

¹⁸ Unube unwanyi; unu wozekwaru ji unu onwunu ali; kele oo ya bu iphe, gbaru onye etso Nnajiuphu l'ememe.

¹⁹ Unube unwoke; unu yeje nyee unu obu. Unu ta adujekwaru phe ehuka.

²⁰ Unube unwegirima; unu nujeru ne le nna, nwuru unu opfu l'iphemiphe, epe epfuru unu. Noo l'oo iphe, du Nnajiuphu ree bu ono.

²¹ Unube nna; unu te emekwa unwegirima unu iphe, e-ghu phe eghu; anonya obu dahu phe adzulakpa.

²² Unube ndu bu ohu; unu mejekwa iphe, ndu bu nnaji unu k'eliphe-a ziru unu. O to bukwapho teke epe ele unu enya be unu e-meje iya g'ee-shi g'aa-jaa unu ajaja. Unu gudejekpopho obu iphoro me iya. Iphe, unu azobeje eme iya aburu le Chileke duru unu le nso. ²³ Iphe, bu iphe, unu emekpo; unu phubeje iphu me iphe obu maru l'oo Nnajiuphu anyi be unu emeru iya. Unu te emekwa iya g'ọ bu nemadzu be unu emeru iya. ²⁴ Unu nyatajeka l'oo Chileke be l'e-bu unu obunggo iya, bu iya

bụ lẹ Nnajiuphu l'a-nụ unu iphe ono, o kwetaru ndu nkiya ukwe iya ono. Noo kele ọo Kéreshi bụ Nnajiuphu, bẹ unu ejeru ozi. ²⁵ Ọle onye eme iphe-ẹji bẹ Chileke a-pfukwanu ugwo ọphu gbaru iya nụ; m'obeta onye ọbu buru onye. Noo lẹ yẹbedua, bụ Chileke ta adudu onye oole ọnya l'iphu.

4

¹ Unubẹ ndu bụ nnajiuphu; unu mejekwaru ohu unu iphe, pfuru ọto mẹ iphe, rwuberu pẹ nụ. Unu nyatajẹkwa l'unubẹdua nwekwarupho onye bụ Nnajiuphu unu, bu l'imigwe.

Iphe unu e-meje

² Unu yemia ishi l'epfu anụ Chileke; unu eche nche; ekelejẹkpọe ya pọ ekele. ³ Unu pfujekwarupho opfu ẹhu anyi nụ Chileke sụ iya g'o mee g'anyi nwejeru ẹka anyi e-zije ozi-oma ono; mbụ g'anyi zije k'iphe ono, Chileke shi domia edomi, bụ iya bụ Kéreshi l'onwiya. Ọ kwa k'ozima ono bẹ o gude a tụa mu mkpọro-a.

⁴ Unu pfujekwarupho nụ iya g'o mee mu gẹ mu duje ike pfuje iya g'o doo ọnya lẹ g'ọ gbaru mu l'epfufu iya.

⁵ Unu meje umere ndu maru iphe l'iphu ndu abudu ndu kẹ Kéreshi. Unu ta ahajẹkwa ọzo duru unu g'ọ laa kẹ mmanụ. ⁶ G'opfu unu guje egugu; dujeepho g'iphe, únú tsuru; k'ọphu ooheje ndu unu epfuru iya ihee angaberu unu nchị. Unubẹdua amakwanuru g'unu e-yejeru onyemonye ọnu l'opfu.

Ekele ikpazu

⁷ Tikikọsu e-pfukọtarua unu gẹ mu eme ala. Yẹbedua bụ nwanna anyi, anyi yeru obu; bya aburu onye-ozima, e gude ire iya ẹka; bya aburu onye anyi l'iya tukuroru eje ozi ono. ⁸ Mu ziru Tikikọsu obu g'ọ bya ndu-unu bya akọoru unu g'anyi l'eme ala; teme l'oo-mekwaaphọ g'obu shihu unu ike. ⁹ Onye anyi tukuroru yẹ l'iya ezi g'ephẹ bya ndu-unu ono bụ Onẹsimosu, bụ onye anyi yeru obu; bukwarupho onye goshi-fuakwarupho lẹ ya gbaru g'e gude ire iya ẹka; mbụ Onẹsimosu k'ibe unu. Ephenẹbo ono akọwaruro unu g'iphemiphe, dū l'ibiya-a.

¹⁰ Arisutakọsu, bụ onye mu l'iya tukuroru nọdu lẹ mkpọro l'ekelekwaphọ unu. Maku nọdu ekelekwaphọ unu; mbụ nwa nwune-nna Banabasụ. E zihakwaru nzi ẹhu iya; o rwua unu nchị. Teke o shitaru ọzo ibiya k'unu; unu goshijekwa iya l'ẹhu atsọ unu uto l'ọ byaru. ¹¹ Ọ nọdu ekelekwaphọ unu mbụ Jizọsu ono, eekuje Jiọsutosu ono. Ọo ọmadzu ẹto ono bẹ bukwađu ndu Jiu, tso mu eje ozi ono, anyi eje gude egoshi l'ọo Chileke bụ eze ono. Ọ bụru phẹ bẹ anọduje adu mu obu.

¹² Epafurasu k'ibe unu ekelekwaphọ unu. Yẹbedua bẹ bukwaפו onye ejeru Kẹreshi Jizọsu ozi. Oogudeje obu iya g'ọ ha phube iphu epfu anụ Chileke l'ishi ẹhu unu epfushi iya ike. Gẹ Chileke mee g'unu ba akpọjeru laa azu; l'oomekwaphọ unu: unu amakọtaru umere, gbaru onye kẹ Kẹreshi l'ememe ọkpobe amaru; l'oomekwaphọ g'o heje unu ihee emeẹbekota iphe, dū Chileke l'uche. ¹³ Mbẹdua epfukpọo l'onwomu sụ l'oosekpọ akanya ẹhu unu eseshi iya ike; mękpoo akanya ẹhu ndu Layodeshiya;

mẹ kẹ ndu Hiyerapolisu. ¹⁴ Onye dọkinta ono, anyi yeru obu ono, bụ Luku l'ekelekwarọ unu. Ọ nọdu ekelekwaphọ unu mbụ Dimasu.

¹⁵ Unu keleru anyi ụnwunna anyi phẹ ono, nọ lẹ Layodeshiya. Unu ekeleru anyi Nimfa mẹ Chiochi ono, edzukọbeje l'ibe iya ono.

¹⁶ Unu -gụchaa ẹkwọ-ozị-a l'ibiya k'unu; unu mekwaa ya g'ọ rwua ndu Layodeshiya ẹka k'ọphu ẹphebedua l'a-gụkwa iya phọ. Unu agụkwaapho ẹkwọ-ozị ọphu shi Layodeshiya.

¹⁷ Unu zia Akiposu lẹ mu sụru g'ọ kukebekwa ẹhu jeẹbe ozị ono, e ziru iya g'ọ jee l'ozị ono, anyi ejeru Nnajiuphu ono.

¹⁸ Ọo mbedua, bụ Pọlu gude ẹka mu ede ọwa-anta-a gude ekele unu. Unu ta azọhajakwa lẹ mu nọ lẹ mkpọro.

Gẹ Chileke meeru unu eze-iphe-ọma. Nokwa g'ọ dụ.

Bayiburu Izii
Izii: Bayiburu Izii Bible

copyright © 2014 Wycliffe Bible Translators, Inc.

Language: (Izii)

Contributor: Wycliffe Bible Translators, Inc.

All rights reserved.

2020-11-18

PDF generated using Haiola and XeLaTeX on 21 Feb 2024 from source
files dated 29 Jan 2022

c6885c7c-c550-5b8b-a4fe-4bd714af4f6d